

## **Programska deklaracija 2021.**

Naša stranka je socijal-liberalnog ideološkog usmjerenja i kao takva beskompromisno se bori za društvo jednakih šansi i sloboda za sve građanke i građane. S obzirom na višedecenijske separatističke tendencije i dominaciju kleronacionalizma, Naša stranka se profilirala i kroz snažno zalaganje za jedinstvenu, modernu, sekularnu Bosnu i Hercegovinu čiji je suverenitet neupitna i unaprijed zadata vrijednost prilikom bilo kakvog promišljanja o bosanskohercegovačkoj budućnosti. S tim u vezi, na međunarodnom planu, zalažemo se za članstvo BiH u Evropskoj uniji kao garant ekonomskog oporavka zemlje i za NATO integracije koje će otkloniti mogućnost novih ratova i stvoriti perspektivu za trajan i stabilan mir. Također, na međunarodnom planu, djelujemo kao članica grupacije ALDE (Alijanse liberala i demokrata Evrope) kroz koju i u Evropskom parlamentu lobiramo za našu viziju Bosne i Hercegovine.

Bosna i Hercegovina mora iskoristiti svoje ogromne potencijale, a njen najveći potencijal su ljudi u čije znanje i sposobnost da stvore zemlju poput onih u koje, na žalost, sve češće odlaze, ne sumnjamo. Prepreka im je nacionalistička politika, koja usporava realizaciju naprednih ideja i bilo kakav razvoj. Stoga je naš zadatak i vraćanje povjerenja građana u politiku i političare i zato nudimo drugačiju političku paradigmu upravljanja zemljom, onu koja stvara perspektivu te građankama i građanima omogućava planiranje budućnosti ovdje. Moramo zaustaviti epidemiju odlaska ljudi iz zemlje.

---

Da bismo to ostvarili, zalažemo se za nov ustavni model koji će od Bosne i Hercegovine stvoriti pravnu državu i u kojoj će država biti zaštitnik svojih građana a ne političke partije kojima ti građani pripadaju. Prepoznavamo specifičnost Bosne i Hercegovine i potrebu za određenim institucijskim mehanizmima koji će na afirmativan način zaštititi multietničko tkivo društva. S druge strane, snažno smo protiv zloupotrebe etničkih prava kao mehanizama dominacije političke elite jedne grupe nad drugima i teritorijalnog rasparčavanja zemlje. Smatramo da svaki građanin mora imati mogućnost da se kandiduje i bude biran za svaku poziciju u ovoj zemlji te da nikome ne smije biti uskraćeno pravo glasa. Činjenica da još uvijek nije implementirana odluka Sejdić-Finci je skandalozan pokazatelj pogubnosti nacionalističkih politika.

Naša stranka potvrđuje da je osnovni subjekt političkog i društvenog života građanin-pojedinac, čija su prava ograničena samo istim takvim pravima drugih i ne mogu se kršiti u ime bilo kojih kolektivnih prava, ideologija ili državnih ciljeva, potvrđuje svoju predanost očuvanju legitimnih kolektivnih interesa konstitutivnih naroda i Ostalih u Bosni i Hercegovini. Uspješna zaštita kolektivnih prava zahtijeva da se ona taksativno nabroje u ustavnom tekstu; institucionalni modeli te zaštite moraju biti u skladu s evropskom praksom.

# DRUGI IZBORNI VANREDNI KONGRES NS

U skladu s prethodno rečenim, zalažemo se i za promjene Izbornog zakona uz što veću digitalizaciju izbornog procesa kako bismo omogućili da na izborima pobijede oni koji glasaju, a ne oni koji glasove broje.

---

Efikasnost i transparentnost javne uprave je jedan od temeljnih preduslova za bolji život građana. Upravo takvu upravu stvaramo tamo gdje participiramo u vlasti. Radimo prema političkim programima koji su bazirani na konkretnim mjerama i ciljevima, stvoreni u konsultaciji s građanima i njihova implementacija se redovno komunicira prema javnosti.

Čvrsto smo opredijeljeni u borbi protiv korupcije, rak-rane našeg društva. Našu opredijeljenost potvrđuju i djela. U Kantonu Sarajevo uspostavljen je Registar zaposlenih u javnom sektoru kao i Ured za borbu protiv korupcije koji je, također, na našu inicijativu uspostavljen i u Tuzlanskom kantonu.

Potrebno je snažno investirati u obrazovanje. BiH mora postati društvo u kojem se znanje cijeni. To je jedini način da prestanemo biti periferija i nekonkurentna sredina. Sva djeca moraju imati mogućnost pohađanja predškolskog odgoja kao vida socijalizacije ali i pripreme za polazak u školu. Sve škole moraju imati osnovne obrazovne standarde koji će osigurati jasno definiran nivo kompetencija koje učenici i učenice stižu nakon završenog školovanja. Sve obrazovne ustanove moraju omogućiti jednakost pristupa i učešća u obrazovnom procesu koji neće jačati etničke podjele i koji će osigurati jednake uslove obrazovanja za svu djecu u BiH. Srednjoškolsko i visokoškolsko obrazovanje mora biti usklađeno s potrebama tržišta rada, a obrazovne institucije moraju biti adekvatno evaluirane. Učešće naših učenika na međunarodnim takmičenjima i evaluacijskim programima, kakva je PISA, ne smije biti dovođeno u pitanje i mora biti na listi društvenih prioriteta.

Zbog političkih prepreka, spore javne uprave i loše vanjske politike i dalje smo na samom začelju u privlačenju stranih investitora. Kad govorimo o stranim investitorima, jednako moramo misliti i na naše ljude koji žive van BiH a koji imaju interes da investiraju. Njihove investicije ne samo da znače smanjenje odlaska ljudi iz BiH, nego i povećan povratak u našu zemlju. Radit ćemo na stvaranju prilika kako bi se ovaj potencijal usmjerio ka razvoju BiH.

Naši poduzetnici su istinski heroji koji i pored svih prepreka uspijevaju da kreiraju mala privredna čuda. Potrebno je dati snažnu potporu privrednom sektoru. To ćemo raditi kroz smanjenje sredstava za birokratiju i državni aparat; poticaje razvoju i zapošljavanju u privatnom sektoru; poticaje razvoju industrijskog i poljoprivredno-prehrambenog sektora; razvijenu socijalnu politiku i zapošljavanje mladih.

Pandemija je pokazala koliko je zdravstveni sektor u Bosni i Hercegovini zapušten, ali i ispravnost politika za koje se zalažemo te dala opravdanje da na tom putu nastavimo. Neke od

# DRUGI IZBORNI VANREDNI KONGRES NS

njih su: Uvođenje proširenog i dobrovoljnog privatnog zdravstvenog osiguranja; uvođenje dodatnih mehanizama kontrole finansiranja zdravstva; uspostava javno-privatnog partnerstva u javnom zdravstvenom sistemu i korištenje zdravstvenih usluga na cijelom teritoriju BiH/FBiH.

Zelene politike i zaštita životne sredine jedan su od temelja našeg rada. Smatramo da koncept održivog razvoja mora postati dominantna odrednica strategije razvoja BiH. To više nije stvar izbora, nego opstanka i to ne samo BiH, nego i čovječanstva.

---

Nacionalizam i etničku političku podijeljenost prepoznajemo kao osnovni razlog neuspjeha društva i zaostatka u ekonomskom razvoju, zdravstvu, obrazovanju, zaštiti socijalnih prava i okoliša. Nastavljamo raditi na politikama koje su reformske i koje mogu biti osnova za preokret. Da bismo tu prepreku otklonili, neophodno je raditi na suočavanju s prošlošću. U tom smislu snažno podržavamo svaku inicijativu, makar i nametnutu izvana, koja vodi ka tom cilju.

Istovremeno, borimo se za društvo koje štiti slobodu govora kao temeljnu praksu društvenog progresa, ali pod slobodom govora ne podrazumijevano govor mržnje.

---

Naša politika postoji radi građana i mi smo otvorena stranka. Naše ideje stalno komuniciramo s javnošću, sučeljavamo mišljenja i ako argumenti suprotnih mišljenja odnesu prevagu, spremni smo se u skladu s njima mijenjati. Tu smo da budemo glas javnosti, glas onih koji su uskraćeni u ovom društvu da žive slobodno i ostvare svoje potencijale.

Spremni smo da saradujemo sa svim pokretima, strankama, organizacijama i pojedincima koji Bosnu i Hercegovinu vide kao zemlju u kojoj su svi njeni građani jednaki na svakom njenom pedlju. Vjerujemo da politički prostor od centra na lijevo predstavlja najznačajniju progresivnu snagu za reformu našeg društva.